

No. 202. 1482. 13. Aug.

*Das Kloster tritt dem Rath einen freien Raum auf dem Klosterkirchhofe ab und sagt die Oeffnung des Klosterthors zu jeder Tageszeit auf vorgängiges Ersuchen zu, wogegen der Rath genehmigt, dass Wasser aus der städtischen Röhrenleitung in das Kloster geführt werde.*

In der heiligen vnde vntheilhaftigen driualdikeit namen selliclichen amen. Nach dem dy ding etc. Also ist czu mercken, das nach Cristi vnßers liben hern heilige gebort virczenhundert dor nach ym czwey vnde achtzigisten iare am dinstage nach Tyburtii haben wir nach geschreibenn, mit namen bruder Nicolaus Beyer doctor der heiligen schrift provincial der provincien zu Sachsen vnde Paulus Yrben prior mit vollem rod gewalt vnde macht des ganczen conventß des elßters czu Pirna prediger orden an eym vnde wir burgermeister vnde ratmanne der ganczen stat Pirna am andern teyle vnns gutlich vnde fruntlich vortragen vm den freyen rawm uff vnßers des closters eygenthum wff vnßerm kirchhofe czwischen dem Buchßen hawße vnde der Schoneschneyderinne hawße gelegen, nach deme der yrbar rat von gemeyner stad wegen vnns alß itzundt regirer an stad vnßers ordens merliche vrsache vnde nutcz nach gelegenheit czu großem frommen kommen ir gezeuge vnde nottdorfft, des sii czu rettunge ires leibes vnde enthaldunge der ganczen stat do behalden mochten, irczalt haben, vnß auß fruntlicher meynunge vnde tiffer ansuchunge vmb gemenes nutezes willen gebeten, das wir vnß von vnßers ordens wegen vnde des conuentß wegen sulchß rawms guttlich erwegenn vnde der stat czu sulchem itzundt irem obberurten nuteze abetreten vnde obirgeben wollen. Nach deme wir denne den irbarenn rat, darczu arm vnde reich allewege nye anderß irkant haben, denne also große liphaber, furderer vnde enthalder vnßers ordens vnde conuentß, vnde synt czu hoffnung, des sich des allewege durch die genode des almechtigen gotes bey yn vnde vnß fruntschafft gunst vnd gutten willen meren sal, dorumme wir obgnanter bruder Nicolaus Beyer doctor der heyiligen schrift ic mit dem prior vnde gantzen samlung des conuentß czu Pirna mit wolbedochten muthe, rechter wisßen, gutten czeitigem rate obirgeben wir mit vnd incrafft dieß briues ann sulchem rawme der stat czu gutte vnßern eygenthum vnde gerechtigkeit, furbaß mehe keyne forderung gerech-tikeit nach anspruche nu vnde czu ewigen geczeiten dor an czu haben getreulich vnde vngeuerlich, vnde bewilligen vns ouch, vnßer thor en czu offen czu tage ader czu nacht, wenn iß dy not fordert vnde sy vns dorumme czu sprechen ane alle wedir rede. Dor kegen vnde sust ouch vmbe sunderlicher gunst vnde fruntschafft haben wir burgermeister vnde radmanne vor vns vnde vnßern nochkommenden denn meh ir genauten hern vnde brudern en vnd eren nochkommenden brudern der prediger orden yn der stat Pirne vorgunst vnde vorgunnen en das mitte vnde in crafft dißes briues nu vnde czu ewigen geczeiten, das sye auß vnßern stad roren reynes wasßers gleich vnßern wasßern kasten nach irer notdorfft yn ir closter czu eynem kastenn furen vnde leyten mogen, wue yn das am gelegisten ist, doch ane schaden der nockwern vnde der stat yn iren steynwegen vngeuerlich, vnde ouch durch iren wasßerloffft wedir aus furen ane alle geuer. Das von vnß beiden teylen obin benanth sulche